

AKASHVANI AIZAWL

REGIONAL NEWS BULLETIN

Date – 12/12/2025 Time - 18:30 -18:40Hrs

HEADLINES ( EVENING )

- Chief Minister Pu Lalduhoma'n Mizorama POCSO case a pung zel chu pawl a tih thu sawiin, naupangte dikna leh chanvo humhalhna dan tha taka kenkawh chu a ngaih pawimawh thu a sawi.
- LESDE Minister Pu Lalnginglova Hmar chuan Mizo thalaiten thiamna an neih chu eizawn theiha chantir a pawimawh thu sawiin, thalaite eizawna kawhhmuh kawngah LESDE department chuan mellung thar an phun thu a sawi.
- Mizoram sorkar flagship programme Bana Kaih (Handholding) Scheme Phase-II ah progress partner ni tura dilna 40,928 a lut tawh.
- Sawrkarin boruak bawlhhlawh air pollution chungchang Lok Sabha-a sawiho a remti.

<><><>

CM

Chief Minister Pu Lalduhoma'n Mizorama POCSO case a pung zel chu pawl a tih thu sawiin, naupangte laka pawikhawihute chungthu rang taka relfel leh naupangte dikna leh chanvo humhalhna dan tha taka kenkawh chu a ngaih pawimawh thu a sawi.

Vawiin khan Chief Minister Pu Lalduhoma chuan a pisa-ah Mizoram State Commission for Protection of Child Rights (MSCPCR) Chairman leh member-te a kawm a, MSCPCR hotute chuan Chief Minister chu Commission chungchang sawipuiin, naupangte aw ni tura sawrkar laipuiin Commission chu a din a nih angin, chak zawka naupangte dikna chanvo an humhalh theihna tura hmalak dan turte an sawiho a. Chief Minister chuan Mizorama POCSO case a pung zel chu pawl a tih thu sawiin, naupangte laka pawikhawihute chungthu rang taka relfel leh naupangte dikna leh chanvo humhalhna dante tha taka kenkawh chu a ngaih pawimawh thu a sawi a ni.

MSCPCR hmalaknain School Education Department-ah routine school inspection neih thin a ni a, Safety of School research-a hmuhchhuahte atangin Recommendation a siam a. Kum 2023 khan Aizawl District Court-ah 'Child Welfare Officer Room leh Children's Room' siam tir a ni a, naupang 814 hmang tangkaitu awm tawhin heng zinga 113 te chu POCSO case avanga court-a kal an ni.

<><><>

## CM RELIEF FUND

December 18, 2023 atanga kumin thlengin Chief Minister's Relief Fund (CMRF)-ah mimal leh pawl hrang hrangin cheng nuai 279 point 27 an chhunglut tawh a; CM Refief Fund atang hian pawl leh mimal engemzaw zat hnenah tanpuina cheng nuai 220 point 88 pek chhuah a ni tawh.

Chief Minister's Office-in a tarlan danin, December 18, 2023 atanga chhiarin CM Refief Fund-ah hian pawl leh mimal hrang hrang 356-in online, cheque leh pawisa tlang hmangin cheng nuai 279 point 27 an chung lut a; sorkar kum kal mekah kumin April ni 1 atanga vawiin thleng khan mimal leh pawl 80-in cheng nuai 31 point 33 an pe tawh a ni.

CM Refief Fund-a sum chhunluhte hi kawng hrang hranga hman a ni a; CMO-in a tarlan danin December 21, 2023 atanga chhiarin CM Refief Fund atang hian mimal leh pawl hrang hrang 1,105 hnenah tanpuina cheng nuai 220 point 88 pek a ni tawh a; sorkar kum kal mekah mimal leh pawl 411 tanpui nan cheng nuai 42 point 28 hman a ni tawh bawk.

CM Refief Fund kaltlanga tanpuina sum hi damlo, khawsak harsa, home leh hmeithai in sak tanpuina atan te, damdawi-ina damlo awmna ba rulhna atan te, oxygen concentrator, wheelchair leh bengdâr leina atan te, raltlan relief camp sakna atan te, Cyclone Remal vanga chhiatna tâwkte leh leimin/lungrem chim siamthatna atan te, vantlang hnatlang puihna atan te, rialin in chung a den chhiatte rangva leina atan te, sabereka khuangkaih vanga in chhia sakthatna leh tuikawng chhia siamthatna atan te, Central YMA Disaster Response Team mamawh leina atan leh thil dang hrang hrang atante pekchhuah thin a ni.



## LESDE MINISTER

Labour Employment, Skills Development & Entrepreneurship (LESDE) Minister Pu Lalnghinglova Hmar chuan Mizo thalaiten thiamna an neih chu eizawn theiha chantir a pawimawh thu sawiin, thalaite eizawna kawhhmuh kawngah LESDE department chuan mellung thar an phun thu a sawi.

Vawiin khan LESDE Directorate Auditorium-ah LESDE Department-in India Skills 2025 hnuai State Level Skill Competition 2025 an buatsaih kharna leh intihsiaka ti thate hnena lawmman semna buatsaih a ni a; khuallian LESDE Minister Pu Lalnghinglova Hmar chuan Mizo thalaite kawng hrang hrangin thiamna an neih thu a sawi a, an hmachhawp hrang hrangah sum hmuhchhuahna tur leh a hlawkna tur ngaihtuah a tul thu sawiin eizawna tlak siam an tum thu a sawi.

Pu Lalnghinglova Hmar chuan tunlai khawvel inher chho zelah tunlai thiamna nena inthlunzawm thiam apiang hma an sawn chak a ti a, nunho thiamna ah khawpui leh thingtlanga cheng thalaiten hma an sawn a tul nia a hriat thu a sawi a ni.

Ministry of External Affairs hnuaiah overseas employment pe thei Recruiting Agent-ah LESDE department an tel ve thu sawiin Minister chuan, hemi hnuaiah hian Mizoram Council for Vocational Training (MCVT) a awm thu leh hei hi Mizoram tan thalaite eizawna kawhhmuh kawnga mellung thar a nih thu a sawi.

*LESDE Minister*

Nakkum January atangin Mizoram Building & Other Construction Workers Welfare Board Member-te tan thil thar ‘Eizawna Kailawn’ an kalpui dawn thu sawiin Pu Lalnghinglova Hmar chuan, Eizawna Kailawnah hian hna chi hrang 16 zirna kalpui a nih dawn thu leh pilot project atan Aizawl West-I, II & III bialah kalpui a ni anga, chumi hnuah Mizoram hmun hrang hrangah kalpui a nih dawn thu a sawi.



## HANDHOLDING SCHEME

Mizoram sorkar flagship programme Bana Kaih (Handholding) Scheme Phase-II ah progress partner ni tura dilna 40,928 a lut tawh.

Adviser to CM (Handholding) Dr KC Lalmalsawmzauva hnen atanga Akashvani News, Aizawl thudawn danin, Bana Kaih Phase-II ah nimin December ni 11 thleng khan progress partner ni tura dilna 40,928 a lut tawh a, heng dilnate hi loan component hnuafia dilna 481 leh Chief Ministers Special Package hnuafia dilna 40,447 an ni.

Bana Kaih Phase-II hnuafia loan component diltu 481 hi mimal anga dil 458 leh pawl anga dil 23 an ni a; CM Special Package diltu 40,447 zinga 40,435 hi mimal anga dil niin, pawl anga dil 12 an awm bawk a ni.

Dr KC Lalmalsawmzauva chuan Phase II hnuafia loan dilna lut hi a concerned department ten an endik mek avangin Bana Kaih Scheme-a thuneitu sang ber Apex Body-in Phase-II hnuafia progress partner dilna pawm an la neih rih loh thu a sawi.



## PRISON DEPARTMENT

Mizorama jail 10-ah táng mi 1,680 an awm mek a, jail tangte hi mipa 1,488 leh hmeichhia 180 bakah an nute tàn vanga jail-a awm ve naupang 12 an ni a; Central Jail Aizawl chu jail tang thei zat bituk aia tang mek zat tam berna a ni.

Mizoram Prison department hnuafia Jail 10 hi mi 1496 tan theihna tura ruahman ni mah se, vawiin dinhmun angin mi 1,680 an tang mek a, jail tang mek zingah hian damchhunga tang tura hrem mipa 56 awmin, hrehawm taka tang tura an chungthu rel mi 372 leh tan pangngaia tang tura an chungthu rel mi 259 bakah an chungthu ngaihtuah mek mi 981 an awm a ni.

Hmeichhe jail tang 180 zingah hian damchhung tang tura hrem an awm lo a, hetihlai hian hrehawm taka tang tura hrem 32 awmin, tan pangngaia tang tura hrem 14 leh an chungthu ngaihtuah mek 134 an awm a; Central Womens Jail, Champhai District Jail, Kolasi District Jail leh Serchhip District Jail-ahte dan bawhchhiat vanga an nute tàn vanga jail-a awm ve naupang 12 an awm bawk a ni.

Mizorama Jail lian ber Central Jail hi mipa 480 tan theihna tura ruahman ni mahse vawiin dinhmun ang chuan mi 855 an tang mek a, bituk zat aia tang mek zat tamna hi 375 a ni. Hetihlai hian Siaha District Jail, Kolasib District Jail, Lawngtlai

District Jail, Serchhip District Jail leh Mamit District Jail-ahte tang thei tur bituk zat aia tlem an tang mek a; mi 98 tan theihna tura ruahman Lawngtlai District Jail-ah mi 21 tang mekin, bituk zat atanga chhûtin tang mek zat hi za zela 21 point 43 a ni a, bituk zat aia tang mek zat tlem berna district a ni.

<><><>

## AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

## MIZORAM SECONDARY SCHOOL GAMES

School Education Department buatsaih Mizoram Secondary School Games vawi 42-na chu Govt. Mizo High School, Aizawl tualzawl-ah khar a ni a, Pi R. Lalnunthari, Joint Director, School Education Department-in khuallian niin a hmanpui.

Khuallian Pi R. Lalnunthari chuan zirnain a ken tel infiamna chu zirna huangah a pawimawh thu sawiin zirna leh infiamna kalpui kawp theih chuan rilru leh taksa nasa taka hlawkna a hmuh tur thu sawiin zirlaite chu an taksa vawng uluka zirna leh infiamna kal kawptir thiam turin a fuih a ni.

Ni 4 chhung awh Mizoram Secondary School Games vawi 42-naah hian Sports Discipline hrang hrang ah inel niin a pumpuiah Aizawl District chu Pakhatna niin Champhai District chu Pahnihna a ni a, Pathumna chu Serchhip District an ni

Mizoram Secondary School Games vawi 42 -naah hian District 11-te an inel a, zirtirtu leh zirlai 1900 vel an tel a ni.

<><><>

## AIR POLLUTION

Sawrkarin boruak bawlhhlawh air pollution chungchang Lok Sabha-a sawiho a remti. Union Parliament Affairs Minister Kiren Rijiju chuan Business Advisory Committee thutkhawmah Leader of Opposition in sawiho a rawt tih sawiin sawrkar chuan uluk takin a en a, dan hnuaiyah sawiho dan a ngaihtuah tih a sawi a. Union Minister chuan Lok Sabha rorel ni khatna atangin sawrkar chuan ram tana thil pawimawhte chu sawiho turin a inpeih reng tih a sawiin opposition te rawtna pawh a ngai pawimawh vek a ni a ti bawk.

Vawiina Lok Sabha inkhawm Zero Hour ah Opposition Leader Rahul Gandhi chuan air pollution chu ramin harsatna a tawh mek anih thu sawiin party bil rindan nen sawizawm chi a ni lo a ti a. Pu Gandhia chuan opposition leh sawrkar lamin house a sawiho turin an inrem ngei a beisei thu a sawi.

<><><>